

FILEMONTA

SAN PABLO KARTA KACHASKAMANDA

¹Nuka, Jesucristomanda willaskamandami kai karsilpi wichkaraiani. Waugki Timoteowa kaspá, kam *kuiaska nukanchisinallatata willag Filemontami kai karta kachaiki. ²Chasallata pani Apiata, nukanchisina alli suldadusina waugki Arkipota i kamba wasipi tandaríspa Cristowa tukuskakunatami kaita kachaikichita. ³Nukanchipa Taita Dios i Iaia Jesucristo, kamkunata kuiaspa, suma iuiaiwa kawapuachu.

Filemón, Cristowa suma iuiaríspa, paita iapa *kuiag kaskamanda

⁴⁻⁵Kam Iaia Jesuswa suma iuiaríspa, paita iapa *kuiag kaskatami iachani. Chasallata, Taita Diosmandalla tukui kaugsagkunata kam allilla *kuiaspa aidaskamandapasmi iachani. Chimanda nuka, imaurapas kammanda nukapa Taita Diusta mañaspa, Pai Siñurmi nini. ⁶Kasami Taita Diusta mañapuiki: kam nukanchisina Taita Dioswa iuiarigmanda, Cristollatata nukanchita tukuiipi allilla karamuskata kam iachagsamungapa. ⁷Kam waugkita: Pai Siñurmi niiki, Taita Diosmandalla kaugsagkunata *kuiaspa, allilla aidapuaskamanda. Chasa iachaspaka, nukapas, kuntintaríspa, iapa alli iuiachiiwami kani.

Onésimo suti Filemón randiska lutrinmanda mañaskamanda

⁸Kasapasmi niiki: nuka, Cristo kikin agllawaska kagmanda, kamta ningapami pudiiki, imasa rurangapa chaiagta. ⁹Chasa pudispapas, *kuia-nakuspami kasa mañaiki. Nuka Pablo, ña rukumi kani. Jesucristomanda willaspa purikugmandami kunaúra kai karsilpi wichkaraiani. ¹⁰Nuka kaipi kankama, waugki Onesimoka, Jesucristowa suma iuiarigsamuspa, nukapa wambrasinami tukugsamurka. Paimandami kamta kasa mañakuiki.

¹¹Onésimo, ñugpata kamba lutrin kaspá, kamta ñi imapa mana bali karkachu. Ikuti kunaúrika, kammanda i nukamandapas iapa suma ruragmi tukugsamurka. ¹²Paita kutichikuikimi. Imasami nukata suma

chaskiwantrangi: chasallata paitapas suma chaskipuangi. ¹³Paita munakurkanimi, nukawa kidarichu; chasaka, nuka Alli Willaimanda wichkaraiaskapi kankama, kamba kuintapi pai aidawangapa. ¹⁴Chasa iuiakuspapas, kam manara “Ari” niwankama, mana munanichu chasa rurangapa. Chasaka, kam mana aidawankangichu nuka niskamanda. Kam kikin iuiaripa munagpimi chasa aidawankangi.

¹⁵Onésimo, kamba ladumanda manachar iapa unaika anchurirka. Kunauramandaka, imaurapasmi kamllawa kangapa ka. ¹⁶Kunauramanda, kamba lutrintasina *mana charingi. Lutrinmandapas mas allillami kapungapa kangi. *Kuiaska waugkimi kunauramanda niraiangapa ka. Pai, ñami nukapa *kuiaska kapuá. Kam, masmi iukangi paita munanga; pai runa kagmandalla, mana; Iaia Jesuswa nukanchiwa pariju iuiaripa kagmanda.

¹⁷Imasami nukata kamba alli waugkitasina iuiariwangi: chasallata nukata chaskiwagsina paitapas chaskipuai. ¹⁸Pai imapipas pandariska kagpi u ima apaska kutichingapa chaiagpika, nukami kutichisaki. ¹⁹Nuka Pablo, nuka kikinpa makiwami iskribiiki, nispá: nukami kutichisaki. Chasa nispapas, nuka nintraikichar, kamta nukapas dibichiska kagta, Alli Willaita iachachiskamanda. ²⁰Ari, waugki, kam Iaia Jesuswa iuiaripa, nuka niskata allilla rurapuai. Chasa ruraspaka, Cristopa kaspá, nukata allillami kuntintachiwankangi.

²¹Nuka niskata kam rurangapa kaskata iuiaspami kai kartata kachaiki. Kam, mana nuka mañaskallata rurangapa kangichu. Mas allilla rurangapa kaskatami iachani.

²²Kasapasmi mañaiki: wasi maskapuai, nuka chaiagriura, chisiagringapa. Kamkuna Taita Diusta mañapuanakuskamandami suiakuni, pai uiaspa, kamkunapagma kachawachu.

Kaiakama, niskamanda

²³Jesucristomanda willaskamanda, nukawa wichkaraiag waugki Epafasmi kamta: “Puangi” niku. ²⁴Nukawa Alli Willaita willag waugki-kuna Marcos, Aristarko, Demas i Lucaspasmi, “Puangi” ninakú.

²⁵Iaia Jesucristo, kamkunata sumaglla kawapuachu. [Chasa kachu.]